


16
LUDOVICI LOSCHI
ABBATIS COMMENDATarii SS. SALVATORIS ET GALLI

SANCTISSIMI DOMINI NOSTRI
LEONIS PAPÆ XII.

PRÆLATI DOMESTICI
DEI ET APOSTOLICÆ SEDIS GRATIA
EPISCOPI PLACENTIÆ
ET COMITIS

EPISTOLA PASTORALIS
AD CLERUM ET POPULUM
DIOECESIS SUÆ.



R O M Æ
EXCUDEBAT DE ROMANIS

Facta a Præsidentibus potestate.

LUDOVICUS LOSCHI
ABBAS COMMENDATARIUS SS. SALVATORIS ET GALLI

SANCTISSIMI DOMINI NOSTRI

LEONIS PAPÆ XII.

PRÆLATUS DOMESTICUS

DEI ET APOSTOLICÆ SEDIS GRATIA

EPISCOPUS PLACENTIE ET COMES

VENERABILIBUS FRATRIBUS, ET FILIIS IN CHRISTO CHARISSIMIS
CLERI ET POPULI PLACENTINI.

GRATIA VOBIS ET PAX A DEO PATRE NOSTRO,
ET DOMINO JESU CHRISTO.

Benedictus Deus et Pater Domini nostri Jesu Christi, qui benedixit nos in omni benedictione spiritali in cœlestibus. Quandoquidem illa tam ferventia vota quibus vos me persecuti fuistis ad hanc principem urbem, et Religionis arcem proficiscentem, ut Episcopus vester benignitate Summi Magnique Pontificis LEONIS XII. Beati Petri Successoris, a cujus Suprema Sede omnis manat Ecclesiastica dignitas, commendatione Augustissimæ et Piissimæ Ducis Nostræ MARIÆ LUDOVICÆ Austriacæ, solemniter diceret et consecraret, adimplevit hodierna Dominica dies dicata patrocinio gloriosissimi Patriarchæ S. Joseph Sponsi Beatissimæ Virginis et Matris Dei MARIÆ.

Tremui sane meæ conscius infirmitatis ad impositum onus, quod summi Viri sanctitate pollentes recusaverunt, et Angeli ipsi formidarent. Erubui et flevi incessantibus lacrymis, dum venerabilibus plena mysteriis Consecrationis actio perficiebatur. Videbar mihi vos ipsos, Fratres et Filii charissimi, conspiceræ præsentés, cum Eminentissimus et Reverendissimus Princeps Ostiæ et Veliterni Episcopus Cardinalis Julius Maria Della Somaglia, patriæ nostræ decus et gloria, assistentibus Reverendissimis Patriarca Antiocheno, et Archiepiscopo Atheniensi, et manus suas simul adjuagentibus, sacrum Evangeliorum librum superimposuit cervici meæ et scapulis, memoransque mysticum amictum, quo olim Deus electum Aaron inter sacra vestiri jussit, ut intelligentiæ sensum de exemplis priorum caperet secutura posteritas, me gravissime monuit, in ipsa quam pro me fundebat solemni prece, ut in illo Sacerdotii anterioris habitu mentis ornatum significatum agnoscerem; et idcirco quidquid antiqua velamina in fulgore auri, in nitore gemmarum et in multimodi operis varietate signabant, hoc in meis moribus actibusque claresceret.

Deinde vos ipsos audivisse credidi id quod,

circumlinita mihi sacro chrismate capitis corona , Consecrator Episcopus orando prosequatur : Hoc Domine copiose in caput ejus influat , hoc in oris subjecta decurrat , hoc in totius corporis extrema descendat ; ut tui spiritus virtus et interiora ejus repleat , et exteriora circumtegat . Abundet in eo constantia fidei , puritas dilectionis , sinceritas pacis . Sint speciosi munere tuo pedes ejus ad evangelizandum pacem , ad evagelizandum bona tua . Da ei Domine ministerium reconciliationis in verbo , et in factis , in virtute signorum et prodigiorum . Sit sermo ejus et prædicatio non in persuasibilibus humanæ sapientiæ verbis , sed in ostensione spiritus et virtutis . Da ei Domine claves regni cœlorum , ut utatur , non gloriatur potestate , quam tribuis in ædificationem , non in destructionem .

Nonne quasi pro vobis ipsis extimuiſtis , quamvis in tanta semper reverentia habueritis Episcopos vestros , cum Ille subtexit : Qui maledixerit ei , sit ille maledictus , et qui benedixerit ei , benedictionibus repleatur ? Tum ad me orationem revocans : Sit (ait) fidelis servus et prudens , quem constituas tu Domine super familiam tuam , ut det illis cibum in tempore opportuno , et exhibeat omnem ho-

minem perfectum . Sit sollicitudine impiger , sit spiritu fervens , oderit superbiam , humilitatem ac veritatem diligit , neque eam unquam deserat aut laudibus , aut timore superatus . Non ponat lucem tenebras , nec tenebras lucem ; non dicat malum bonum , nec bonum malum . Sit sapientibus et insipientibus debitor , ut fructum de profectu omnium consequatur . Tu Domine sis ei auctoritas , sis ei potestas , sis ei firmitas .

Postrema hæc verba non modice animum meum crexerunt recogitantem quod etsi nemo ex se ipso idoneus sit vel mente concipere aliquid boni , multo minus et facere ; omnia tamen possem in eo qui ad Episcopale ministerium sancto oleo suo me ungebat , et extenso invisibili brachio confortabat . Nec enim frustra et sine magno effectum dixit mihi Pontifex : Accipe Spiritum Sanctum . Hac spe suffultus lætior accepi baculum pastorem , ut sim in corrigendis vitiis pie sæviens , iudicium sine ira tenens , in fovendis virtutibus auditorum animos demulcens , in tranquillitate severitatis censuram non deserens . Accepi et annulum , Fidei scilicet signaculum , quatenus Sponsam Dei , Sanctam videlicet Ecclesiam , intemerata fide ornatus illibate custodiam . Cumque sæpius

Deo placeat ponere humile in sublime, et per ea quæ non sunt, ea quæ sunt destruere, Pontificali Mitræ caput submisi, istaque galea munitionis et salutis armatum erexi, ut jam non mea, sed Divina virtute cornibus utriusque Testamenti terribilis appaream adversariis veritatis, et impugnator eorum robustus existam.

Sed gubernandam suscipio Ecclesiam, cujus antiqua est Religio et fides, quam semper immaculatam ab ejus exordio retinuit. Huic sanguine suo S. Antonius Martyr ex fortissima Thebæa Legione fundamentum jecit; tueturque simul Sancta Justina Virgo et Martyr Antiochena, cui dæmones ipsi irati sunt, quod non satis ei fuisset Antiochiam olim accisis ipsorum viribus ad Christum perduxisse, nisi eosdem Placentiæ male perditum iret (1). Tyrannorum persecutionem vicit fides, jamque ejus triumpho felici omine præluserat S. Victor primus Placentiæ Episcopus, cum primum Templum S. Victori Martyri dedicavit. Inde S. Savi-nus, qui interfuit Nicæno Concilio, et Jesum Christum Filium Dei unigenitum Omousion Patri cum trecentis illis et decem octo Episcopis conclamavit; cujus tanta erat doctrina

(1) Ex Lect. V. Off. Translat. S. Just. V. et M. pro Placentina Ecclesia approbat.

et fidei integritas , ut magnus Ambrosius eidem scripserit professionem fidei suæ, librosque emendandos identidem submiserit . Quid de Mauro , quid de Fulco , quos similiter pro mirabili continentia , humilitate , rerum caducarum contemptu , pauperum amore , orationibus , vigiliis , jejuniis , et non victa laboribus sollicitudine in regenda hac diœcesi , albo Sanctorum insertos veneramur ? Quid de B. Paulo de Aretio Cardinali de Theatina familia , cujus adhuc apud nos supersunt tot monumenta pietatis ? Vere bonorum omnium memoria dignus , qui decreta Sancti Tridentini Concilii suavi quadam persuadendi vi exequi curavit , et Ecclesiasticam disciplinam pristino splendori restituit .

Num obliviscar B. Gregorium X. Pontificem Maximum , jam Theobaldum Vicecomitem Placentinum et Canonicum Basilicæ S. Antonini , qui postea universam Ecclesiam religionis zelo , et Apostolicis curis amplificavit , cum habito Lugduni generali Concilio Patrum numero omnium frequentissimo , Græcos ejurato schismate ad Ecclesiæ unitatem recepit , editisque pluribus sanctissimis Legibus rem sacram publicam communivit ?

Num taceam S. Gerardum Placentinum , qui Potentiæ in Apulia teneram ætatem gratis eru-

diendo talem sibi admirationem pro ejus patientia, integritate et sanctitate comparavit, ut ab illo ludo litterario ad Episcopalem Cathedram evectus sit?

Memorem etiam Sanctos Confessores Peregrinum, Opilium, Gelasium, Dominum, Victorem, Raymundum, Conradum, Philippum, qui mortificatione, qui Ecclesiae cultu, qui pauperum hospitio civitati Placentinae, quae eos genuit, tamquam faces praefulserunt. Memorem Victoriam, Francam, Liberatam, Faustina Placentinas Virgines, quae cum se Christo carne et mente vovissent, opus suum consumaverunt magno praemio destinatum; nunc vero Angelorum agmini admixtae Agnum sequuntur Sponsum, eique dulces et aeternos hymnos personant.

Cum igitur filii Sanctorum sitis, non aliam adhortationem vobis praemitto hac Epistola mea, nisi ut in fide, charitate, pietate, quas a Patribus nostris accepimus, constantissime permaneat. Videte ne quis vos seducat per inanem Philosophiam, quae cum rerum omnium causas curiosius inquit, Deum universitatis hujus Opificem vel non agnoscit, vel ei detrahit providentiam et justitiam; siquidem negat Deum curam habere de nobis, ac praemia et poenas

pro factorum qualitate decernere , simul ever-
tens fundamenta virtutis et societatis . Ab hu-
jusmodi impiis aurem retrahite , eorum Libros
ne legatis , nec ab uxoribus , filiis , aliisque ve-
stræ curæ commissis legi et retineri patiamini .
Adhærete uni , Sanctæ , Catholicæ , et Apostoli-
cæ Ecclesiæ ædificatæ supra petram , quia supra
Petrum , cui etiam in Successoribus suis Dei Fi-
lius tantam contulit cum summa ligandi atque
solvendi auctoritate fortitudinem , ut portæ in-
feri nec contra Ecclesiam , nec contra Supre-
mum ejus Caput unquam prævalere possint .
Illam ergo amate , cœlestem ejus doctrinam
corde retinete , saluberrima ipsius præcepta
tamquam boni filii adimplere omnino curate .
Est enim ipsa mater christianorum verissima
(verbis utor admirandi Augustini) , quæ non
solum ipsum Deum , cujus adoptio vita est bea-
tissima , purissime atque certissime colendum
prædicat , sed etiam proximi dilectionem et cha-
ritatem ita complectitur , ut variorum morbo-
rum , quibus pro peccatis suis animæ ægrotant ,
omnis apud se medicina præpolleat . Illa pue-
riliter pueros , fortiter juvenes , quiete senes ,
prout cujuscumque non corporis tantum , sed
animi actus est , exercet et docet . Ipsa fœmi-
nas viris suis ad propagandam prolem , et ad rei

familiaris societatem casta et fideli obedientia subjicit. Ipsa viros conjugibus non ad illudendum imbecillio rem sexum, sed sinceri amoris legibus præficit. Ipsa parentibus filios libera quadam servitute subjungit, parentes filiis pia devotione præponit. Ipsa fratribus fratres religionis vinculo firmiore atque arctiore quam sanguinis, nectit. Ipsa omnis generis propinquitatem, et affinitatis necessitudinem, servatis naturæ, voluntatisque nexibus, mutua charitate constringit. Ipsa dominis servos, non tam conditionis necessitate, quam officii delectatione docet adhærere. Ipsa dominos servis summi Dei communis Domini consideratione placabiles, et ad consulendum quam coercendum propensiores facit. Ipsa cives civibus, gentes gentibus, et omnes prorsus homines primorum parentum recordatione, non societate tantum, sed quadam etiam fraternitate conjungit. Docet Reges prospicere populis; monet populos se subdere Regibus. Quibus honor debeatur, quibus reverentia, quibus timor, quibus consolatio, quibus disciplina; quibus objurgatio, quibus supplicium sedulo docet, ostendens quemadmodum et non omnibus omnia, et nulli debeatur injuria. De mor. Ec. Cath. cap. 30.

Has sanctissimas leges, saneque divinas, qui-

bus stat Christiana Societas, quasque Philosophia aequare non potuit, populus ab ore vestro requirit, o Sacerdotes. Vos estis lux Mundi. Videte ergo quemadmodum unumquemque opportune admoneatis. Fons sapientiæ verbum Domini. Sacram Scripturam diu noctuque versate, in qua cuncta continentur documenta virtutum. Vos estis sal terrae. Condite fidelium mentes exemplis vestris, ut quisque vobis jungitur, quasi ex salis tactu aeternæ vitæ sapore condidatur. Modestiam sequimini, pacem amate, negotiis saecularibus nullo modo vos admisceatis. Sacros canones et synodales Constitutiones, præsertim de vita et honestate Clericorum, frequenter legite, eisque mores vestros omnino conformate;

Prælucebit universo Clero Capitulum Cathedralis, in quo nunquam non gloriabor me prius Canonici, postea Archipresbyteri locum tenuisse, nunc vero et Senatum habeo et auxilium. A Matrice Ecclesia sument alia Canonicorum Collegia exemplum majestatis, gravitatis, devotionis, et ordinis, quibus divinæ laudes decantantur, et sacrae omnes liturgiæ partes peraguntur. Ad illam coelestem aulam singuli intendant, in qua mystica quatuor animalia, et viginti quatuor Seniores circumamicti ve-

stimentis albis, habentes singuli phialas plenas odoramentorum, quæ sunt orationes Sanctorum, se prosternunt ante thronum Dei et Agni, et benedictionem, claritatem, honorem, et gratiarum actionem adprecantur Viventi in sæcula sæculorum. Ita ergo sacram psalmodiam, et alia divina officia omnes choro addicti perficite, ut digni sitis quod desideria et postulationes vestræ ad æternum et invisibilem Deum ambitioso Angelorum famulatu pervehantur.

Pastores animarum, qui plus omnibus laboratis, novus Compastor vester amantissime alloquor. Haec summa ministerii vestri, animas salvas ducere a regenerationis fonte ad januam Regni. Qua patientia rudes catechizandi, qua solertia adolescentes examinandi, et disponendi ad Sacramenta, quo studio verbum Dei singulis diebus festis in Missa enucleandum: qua charitate poenitentes suscipiendi, qua doctrina instruendi, qua divina arte ab inordinato amore creaturarum ad amorem Dei reducendi, qua discretione et justitia satisfactiones imponendæ, quæ medicamina humanæ infirmitati suggerenda, ut a peccatis absoluti salutem stabilem adipiscantur! Porro infirmi visitandi, consolandi, Sacramentis muniendi, in mortis articulo benedicendi, misericordie Deo

in agone commendandi, non derelinquendi nisi ipsi terram dereliquerint.

Sed insuper generali quadam vigilantia vos prospicitis, ut fides conjugalis inviolata serveatur, ut filii in timore Domini educentur, ut pax regnet inter familias, ut succurratur pauperum necessitati, ut scandala omnia a parœcia removeantur. Hæc laus vestra est, optimi Parochi mihi cogniti Ecclesiæ Placentinæ. Nil aliud optem, quam vestris coronis me participem fieri.

Amate etiam, sicut et facitis, decorem Ecclesiarum vestrarum, et munditiam omnem in sacris suppellectilibus, sed præsertim in illis, quæ sanctissimæ Eucharistiæ deserviunt. Ita agite cum piis Administratoribus Fabricarum Parochialium, ut concordî animo nil aliud velit, et illi velint, quam quod maxime requirit sanctitudo loci, ubi Deus inhabitat, et ubi sacrosancta et tremenda Religionis nostræ mysteria celebrantur.

Quo animo et reverentia affectus pariter sim erga vos adjutores Parochorum, qui cœlestem Mariæ vitam in claustris cum Marthæ sollicitudine in ministerio mirifice conjungitis, bene nostis, et gratulari potius vobiscum et gratias habere debeo, quam ad aliquid adhortari. Id

tamen meo jure postulo , ut orationibus vestris , sacrisque functionibus cum parochialibus coordinatis , populo quidem fulcimenta pietatis , mihi vero de spirituali oleo , quo ardent ante Deum animæ vestræ in contemplatione , tantillum praebeatis .

Quidni idipsum expectem a sacris Virginitibus , quæ carnem spiritui subigentes continuo student quomodo placeant Deo ? Vos florem appellat S. Cyprianus ecclesiastici germinis , atque ornamentum gratiæ spiritualis , lætam indolem , laudis et honoris opus integrum atque incorruptum . Igitur ad vos etiam sermonem converto , vos adhortor affectione potius quam potestate , ut cum consilio Directorum vestrorum spiritualium omnem vitam vestram sic semper componatis , ut perfecte respondeat ad sanctimoniam Domini , quem vobis Sponsum tam feliciter elegistis .

Particeps ego sum , Domine , omnium timendum Te . Ideo et ad vos , piæ Laicorum Sodalitates , et devota Consortia , amoris mei sermo dirigitur , non quo vobis novum addam incitamentum ad pietatis exercitia frequentanda , quod jam summa aedificatione facitis in Oratoriis vestris , sed cupiens , ut non minus parochiales Ecclesias matres vestras distributis tem-

poribus frequentetis. Quapropter sicut estis primi inter Parochianos Religione et Christianis moribus, ita estote erga ipsas Paroecias vestras devotione præcipui.

In imo vos pectore habebam, candidissimi Iuvenes Seminarii dioecesani et Collegii Albe-roniani, qui spem Dioecesis continuo erigitis et alitis; et ideo cum cæteris jam plura verba consolationis et exhortationis dederim, vobis postremo cor meum dono. Præceptores, et Institutores vestri scientia Sanctorum et pietate prævalidi vos efformant et præparant Ecclesiæ bono. Unus fons est, de quo bibitis cœlestem sapientiam. Satagite servare hanc doctrinæ unitatem, ut quia conjunctis viribus hodiedum omnes Sectæ contra Catholicam Fidem conspiciant, sic vos conjuncti animo et studio eam suo tempore armis uniformibus instructi defendatis; et unum sapiendo, in regimine animarum uberiores fructum consequamini. Id obtinebitis excolendo sententias Sanctorum Augustini et Thomæ Aquinatis, quos veluti oculos universæ Theologiæ Ecclesia suscipit ac veneratur. Replemini spiritu S. Vincentii a Paulo, eumque vobis imitandum proponite tum pietate et amore in **IESUM CHRISTUM**, extra quem nihil vobis placere, ut ipse sæpe,

dicatis, tum zelo et charitate præsertim in ruri-
colis et pauperibus evangelizandis, *elegit enim
Deus pauperes hæredes Regni sui.* Exemplar ha-
betis in ejusdem filiis venerabilibus Presbyteris
Congregationis Missionis, quibus æterna obli-
gatione devincta est Ecclesia nostra, quod eo-
rum cura et laboribus, seu in majoribus Cle-
ricis instituendis et exercendis, seu in frequen-
tibus Missionibus habitis per totam qua late
patet Dioecesim, vestem et colorem mutavit.
Sic ergo proficite, Christi Levitæ electi, et ejus
sanctæ domus Ephœbi, ut jure vocemini Pasto-
ris gaudium et corona.

Oro gloriosissimam semper Virginem MA-
RIAM in cœlum assumptam, quæ deliciis affluit
in sinu Filii sui, cujus non solum videt Hu-
manitatem, quam ab ipsa suscepit, mortis vic-
tricem et clarissima luce splendentem ad dexte-
ram Patris, sed intuetur etiam Divinitatem, et
torrente voluptatis ^{PAT} effunditur: Oro beatissimum
Ejus Sponsum S. Joseph, in cujus Patrocinii Fe-
sto quam faustissimo Episcopus consecratus sum:
Sanctum Antoninum oro et Justinam et Cœlites
omnes hujus civitatis et Diœcesis Patronos, ut
votis meis obsecudent, et vires mihi addant,
et lumen impetrent a Patre luminum, et con-
stantiam, ut quod pro salute animarum, pro

Cleri disciplina , pro Ecclesiæ splendore a me expectatis , Fratres et Filii charissimi et desideratissimi , id et si mea virtute non possum , pientissimo tamen eorum auxilio exequi valeam.

Invoco divinum Numen super Oecumenicum Ecclesiæ Pastorem et Patrem , verum Jesu Christi Vicarium , et totius Christianitatis Caput **LEONEM XII.** , ut Deus et Dominus Noster eum sospitem perfectè reddat , et incolumem custodiat Ecclesiæ suæ sanctæ , ut Christiana plebs sub tanto Pontifice fidei suæ meritis augeatur ; et Placentina Diocesis quæ honorem obtinuit , ut Romanæ Sedi sit immediate subiecta , claris Ejus virtutibus jam magis proxima incrementum accipiat Religionis , et hoc singulare privilegium fructibus antiquæ suæ devotionis erga Apostolicam Sedem accrescat .

Deus summus , a quo omnis potestas emanat , qui cœlestia simul et terrena moderatur , respiciat etiam ad Augustissimam et Religiosissimam Ducem Nostram **MARIAM LUDOVICAM** , ut cui dedit cor Matris amantissimæ populi sui , Illam Subditi revereantur et ament ut filii , ejusque sollicitudinibus pro publica et privata tranquillitate servanda , ipsorum felicitate augenda obsequantur . Proceres virtute refulgeant ; Magistratus custodia justis.

tiæ et veritatis. Protectrix Religionis et morum terreat qui fidem moresque corrumpunt. Grata redoleant thimiamata in Ecclesia, et preces ingeminentur pro sospitate munificæ cultricis Templi sancti Dei. Gloriosa et felix sine fine regnet cum Christo in cœlis, quæ Regnum Christi avita pietate suffulsit in terris.

Gratia Domini Nostri Jesu Christi, et charitas Dei, et communicatio Sancti Spiritus sit cum omnibus vobis. Ex hoc plenissimo fonte Unius Trinique Dei primam meam pastorem benedictionem, licet absens corpore, spiritu tamen præsens, vobis peramanter impertior.

Dat. Romæ extra Portam Flaminiam VII.
Idus Maji MDCCCXXIV.

LUDOVICVS EPISCOPUS.

I M P R I M A T U R ,

Si videbitur Reverend. P. Magistr. Sacr. Palat. Apost.

Joseph della Porta Vicesgerens .

I M P R I M A T U R ,

Fr. Philippus Anfossi Ord. Præd. Mag. Sacr. Palat. Apost.

VH1
1546118